

職官表下

民國推事

郭遇葵

蒼梧人國立廣東
法科學院專門部
畢業蒼梧地方法
院貴縣分庭主任
推事民國二十年
任

牟烈猷

鬱林人國立廣東
法科學院專門部
畢業候補推事民
國二十年任

封傳雲

容縣人上海法政
學院畢業候補推
事民國二十年任

韋帛如

柳州人國立廣東
法科學院畢業候
補推事民國二十
一年任

檢察官

甘嘉勳

扶南人上海法政
大學畢業蒼梧地
方法院貴縣分庭
檢察官民國二十
年任

陸仲蘭

昭平人上海羣治
大學畢業候補檢
察官民國二十年
任

秦輔仁

桂林人北平中國
大學法律系畢業
蒼梧地方法院貴
縣分庭檢察官民
國二十一年任

曾昭立

岑溪人廣東國民
大學法科法律系
畢業候補檢察官
民國二十一年任

職官表下

宜績

職官表下

四二八

盧際清

容縣人北平朝陽
大學專門部法律

本科畢業蒼梧地

方法院貴縣分庭

主任推事民國二

十二年任

湯誠意

靈川人廣西公立
法政學校法律本

科畢業候補推事

民國二十二年任

陳之雄

北流人國立廣東
法科學院專門部

畢業候補推事民

國二十二年任

牟烈猷

鬱林人國立廣東
法科學院專門部

畢業蒼梧地方法

院貴縣分庭檢察

官民國二十二年

任

陽

鈞

靈川人廣西公立
法政學校畢業候

補檢察官民國二

十二年任

貴縣志卷十六

人物

列傳 果行表
耆壽表

列傳

太平天國先烈
列女

漢

養奮字叔高鬱林布衣和帝永元六年三月詔陰陽不和水旱違度令三公中二千石二千石內郡首相舉賢良方正能直言極諫之士各一人遣詣公車奮舉賢良方正對策曰天有陰陽陰陽有四時四時有政令春夏則子惠布施寬仁秋冬則剛猛威行刑賞罰殺生各應其時則陰陽和四時調風雨時五穀升今則不然長吏多不奉行時令爲政舉事干逆天氣上不恤下下不忠上百姓困乏而不卹哀衆怨鬱積故陰陽不和風雨不時災害緣類水者陰盛小人居位依公營私讒言誦上雨漫溢者五穀有不升而賦稅不爲減百姓虛竭家有愁心也

參後漢書

和帝紀并五行志 卒祀鄉賢府志
注引廣州先前傳

宋

梁詔少孤事母孝舉孝廉元豐中任廣東提刑司幹官母卒廬墓建罔極亭手蒔松柏久之成林有甘露降於樹芝草生庭側蘇軾自海外歸聞其孝行枉道見之名林曰瑞松改題亭曰甘露詔命二子謁軾勉以力學以薰風二字署其讀書處

參梁志府志

按改建梁孝子祠徵文錄有開平梁燮乾詩序略謂家譜載六十三世祖宋代繼美公諱紹孝德甚詳獨故居遺像失傳民國九年春貴縣李劍堂以梁孝子遺像石刻拓本見示并詳述孝子事迹予考家譜與繼美公全同家譜云諱紹而志乘作詔殆傳寫之誤又按梁氏家譜紹父子貴妣趙氏配趙氏子二撫民愛民今子孫繁衍於廣東新會台山恩平開平鶴山東莞諸縣梁啓超等皆其

裔孫附記於此以俟考證

王俊臣東坡自藤來潯訪梁詔說

按蘇文忠公謫海南詩原引云吾謫海南子由雷州被命即行了不相知至梧州乃聞其尚在藤也旦夕當追及和陶止酒詩引亦云五月十一日相遇於藤同行至雷稽之年譜紹聖四年丁丑時先生年六十二在惠州四月再謫瓊州別駕昌化軍安置即儋州也是歲子由亦貶雷州據此則東坡追及子由由藤而鬱而雷州而海南不必由潯其來潯也殆迂道歟時周茂叔適館程大中公家明道伊川從受學讀書潯屬之暢巖即龔州也茂叔二子一名壽字秀老後改元翁元豐五年登黃裳榜進士一名燾字通老後改次元元祐二年登李常寧榜進士次元乃東坡知貢舉所得士東坡以詩寄茂叔稱先生以茂叔廉溪比柳柳州愚溪傾倒已極枉道過潯先訪茂叔而後及梁詔也謫海南詩嘗云天其以我爲箕子要使此意留要荒志云過潯訪梁孝子詔爲署瑞松林及甘露薰風兩亭額并書南澗東湖兩井石刻必不意在存翰墨也和陶止酒詩并云與子各意行同落百蠻裏蕭然兩別駕各携一稚子所以梁詔亦使二子往謁不惟藉申親炙且欲聞眉山過庭教也故初謫惠州詩即云會有幽人識寓公及再謫海南詩又遂云江邊父老能識予壹似潯郡人士亦早聞東坡名一時引重爭相倒屣率知名士即如柳柳州雖隔別稍遠在紹聖二年六月九日東坡曾爲書大鑑碑六月十九日又爲作大鑑碑跋二年二月六日又爲書南澗詩跋後在儋州無書可讀過黎子雲家

見柳柳州文集數冊假以歸竟日玩誦則前後心折柳柳州與厚視周茂叔無異再考之年譜東坡追子由遇於藤就肆鬻湯餅共食後與子由同臥起僕僕水程山驛間者兩旬有餘至雷寔六月五日雷守海康令出接於郊外七日子由僦屋不遂公迫朝命八日遂行雷守專使津送以往九日聞馮大鈞已迎海上故六月十一日渡海抵儋州卽海南也然則東坡與子由由藤而潯而鬱而雷州而海南水陸並進潯州上通鬱林東坡訪周茂叔後遂接訪梁詔一路順程不必迂道來潯也而子由隨東坡過龔州過潯州刺磨滅竟不一投其爲寡言鮮欲落落自高可知矣又何怪東坡於二程讀書臺所謂羅叢巖東碧虛洞者絕無一語題贈說者謂伊川與東坡素不相合後龔龔益甚過潯緣慳一面容或有之蓋東坡爲人剛直拓大不羈嘗與司馬君寔亦相忤云清陳璠東坡先生至貴縣辨疑

志云東坡過潯訪梁孝子詔爲署瑞松林及甘露薰風兩額并書南澗東湖兩石刻語甚分明無可疑也乃有謂東坡謫海南取道藤鬱經廉雷無由至潯指志爲誣噫過矣讀先生和陶止酒詩引五月十一日相遇於藤同行至雷先生年譜亦載紹聖四年先生謫儋州子由貶雷州先生追子由遇於藤與同臥起僕僕水程山驛間兩旬有餘至雷實六月五日先生五月十一日由藤啟節六月初五日始抵雷州夫由藤至鬱不過五日程由鬱至廉由廉至雷均不過五日程合計半月可達何得遲至兩旬有餘其紆道而行也必矣然先生何爲而紆道哉竊意是時周茂叔館於潯程明道伊川從學讀書於羅叢巖茂叔次子燾登元祐二年進士榜爲先生知貢舉所得士先生素傾倒

茂叔特由藤溯流而上訪茂叔於潯潯與貴毗連先生聞梁孝子名因至貴訪之遂由陸路赴鬱所謂水程山驛也中間輾轉延兩旬有餘至於雷雖紆道仍順道志不虛也考據家何但計途不計日耶何但計水不計山耶故鄉風景日繫懷抱久思明言以解羣惑適甲午臘月梁君崧生修邑志成郵寄全稿索序並屬補書南澗東湖字以續先生之美爰舉向所欲辨者辨之願後之才士毋逞一己之私誣古人轉以自誣焉則厚道之所傳遠矣余更有進者滄桑歷劫典籍易殘此事也幸有先生年譜及陶止酒詩引可攷倘並此而缺之又何以辨吾儕居今稽古尙論前蹤凡可以維持風教者寧可信其爲有以興起善心不必證其爲無以消除佳話志先生至貴因訪孝子而來表先生好賢之衷明孝子感人之驗卽非真亦足風也何所害而疑焉質諸崧生當亦首肯

施才號拙翁大觀時舉孝廉第一通判宜州宣和間征莫往崗

梁志作莫峒

蠻賊有功秩滿至京師因入對徽宗問南方風物對曰道德一而風俗同帝喜其質遷朝散郎永州太守後歸隱北山自號北山主人終焉或

云卒於途

府志參文載

俞公佚其名性沖和澹於榮利著書自樂間作古近體詩氣韻清遠棲巖飲壑有高舉遠引之致生平忠厚自持爲鄉里敬仰人咸稱爲俞處

士云

據梁志修

俞仲昌居慶林坊高蹈之士也居嘗以養性爲事鄉人尊之稱爲老先生至和中郡守李某贈詩云家對南山第一峯誰知大隱隱松蓬閒身悟道持心得俗事隨緣見性通門外高車無俗客篋中靈藥是陰功年來更喜兒孫盛俊筆香名紹素風事見圖經人物門府志據輿地紀勝補

按府志謂舊志載俞處士而不詳其名或以爲宋人或以爲明人夷攷其行大率與仲昌類其爲一人無疑殆年代久遠舊志未及攷核耳今據紀勝補傳於此使數百年不彰之名字昭然其見亦快事也

曹彥約元豐元年知湖南郴州創建城池爲政有聲州人祀之載湖廣

名宦志

梁志據通志

明

蒙普

府志云普或作晉

字有光正統十一年貢生

府志作十年

少時曉行河干得遺金

持歸復立其處候失金者俄有賈人悲號而至問故勘其數相符引歸

付之賈酬以半不受累官五軍都督經歷遷鶴慶府知府以廉潔稱

參梁

志府

沈希儀字唐佐號紫江嗣世職爲奉議衛指揮使機警有膽智計過人正德十二年調征永安以少擊衆搗陳村賊砦馬陷淖中騰而上連馘三酋破餘賊進署都指揮僉事義寧賊寇臨桂敗希儀追之賊設伏誘官兵希儀獨策其詐從別隘抵賊巢大破之荔浦賊衆渡江東掠希儀先率兵五百駐白面砦待其歸圖之度滑石灘狹蛟龍灘廣廣則難圖狹則雖衆可薄乃遣羸卒樹旗燃火於蛟龍灘誘之賊果趨滑石希儀已預設伏兵賊渡且半以小舟乘急瀧衝擊之兩岸軍譟而前賊多溺水死又從副總兵張佑連破臨桂灌陽古田賊進署都指揮同知嘉靖間總督姚鏌將討田州岑猛希儀先用計間猛婦翁岑璋使圖猛兵分五哨進希儀自將中哨賊黨

按明史本傳黨作當

工堯守要地希儀乘夜遣軍二百

緣山繞出其背比明合戰則幟已立山巔賊大潰猛走歸順爲璋所執

田州平鎮抑其功命以參將守田州

按明史本傳作分守思田

希儀尋請還鄉治裝以

張經代之甫一月田州復叛及王守仁代鎮用希儀計思田復定改柳慶參將柳居萬山中離城五里卽賊巢希儀請於制府調那地狼兵來戍得與徭通販易者數十人釋其罪使偵賊動靜甚悉希儀將出兵雖親近弗預聞至期發號則將士咸集以持令旗者爲向導莫測所往及駐軍必設伏賊至擊之無不如志賊寇他所官兵必先至賊乃度官軍所難至者寇之而官軍又未嘗不在賊驚爲神希儀又以計讐服助賊諸徭下令弛熟徭入城之禁并厚賞其黠者使爲謀誘徭婦見其妻賚以食物能以賊情告者則陰厚之諸徭婦利賞爭勸其夫輸賊情故賊無所匿形每偵賊所止宿暗遣人持銃伏舍旁中夜舉銃賊駭曰老沈來矣咸挈妻孥逃遁倉猝間觸崖墜石悔作賊非計及曉則又寂無軍

聲他巢亦然互相驚愕入城偵之乃知希儀固未出城也賊膽多落惟馬平徭魁韋扶諫屢捕弗獲後計使徭人擒之柳州數百里始無有攘奪者十六年思恩岑金叛希儀又以計擒之尋從總督張經破大藤峽弩灘賊旋調四川參將擢都督僉事充總兵官鎮貴州謝病歸會塞上多警召天下名將至京師希儀在召中到京復以病辭二十六年出爲廣東副總兵與總督歐陽必進按明史本傳作張岳破賀縣賊倪仲亮等予寔授時瓊州五指山黎亂總督按明史本傳作總督歐陽必進議并萬州陵水黎討之分兵五道希儀最後至謂總督曰萬陵諸黎惡未著并誅益樹敵莫若止三道兵從之希儀乃率諸軍直入五指山斬其酋黨餘衆招降捷聞進都督同知改貴州總兵官復從張岳平銅仁叛苗又以病歸值倭寇海上命督兵赴剿無功爲周如斗劾罷之希儀爲人坦率言笑洞見肺腑及臨敵奇變莫測每戰必身先士卒屢被創陰雨必痛劇故數謝病尤善撫士

卒嘗染危病營卒多自戕以禱於神其得軍心如此卒後柳人祀之山

雲祠

參梁志通志
明史本傳

明毛伯溫沈紫江將軍傳

沈紫江粵之名將也沈毅辨給能引滿挽強弓步騎絕人其先直隸臨淮人諱葆者高皇帝時以功得官湖廣蘄州衛指揮同知改廣西馴象衛永樂間調奉議衛景泰間祖錠陞指揮使正德戊辰紫江襲父瑛職身倡勇敢勞勩日聞丁丑調征永安諸州直擣巢穴俘獲無算陞都指揮僉事庚辰征古田邊山府江陞都指揮僉書兩考軍政視都司篆授才任能修廢補弊務舉士農嘉靖丁亥領哨_中征田州破燒城砦親斬陸受射中岑邦彥仆壑而斃皆渠之首惡也殺賊蹂屍四十餘里賊首岑猛渡江而遁又窮追獲之督撫引斷多用其謀奏捷紀實上賞攸歸監司保充思田參將尋轉柳慶右參將粵西楚南崇山窳藪寇充斥控制爲難永道等州警無寧日乃選精兵授其計抵諸巢生擒其首惡者七八則黥之縱歸以招其黨聞有侵掠不懲者輒勦夷之降款鎮靜千里晏然誥封鎮國將軍推贈父祖都指揮同知贈祖母封繼母及妻皆夫人紫江機警勇敢其守右江也對面宴飲偶有心計沈默久之授指畫於所部而卽中其宜諸司會議設城以禦斷藤峽之寇紫江曰首惡侯公丁猾且驚出其不意乘春漲據上游撲之可也據立屯堡非計之得後爲公丁夜襲戍兵死者蓋二百人當路曰果如沈子所料紫江穎異能潛悟雖未涉獵文史與之論是非利害動與古合西南形勢蠻夷險易

叩之卽指掌以對往往振舉義事無宿怨仲父琦嘗伏劍待紫江於道左家僮沈達者以身捍遇害紫江乃免琦斃至無以殮紫江襄其事仍恤其孤而爲之娶曾祖諱能者娶朱氏生祖錠繼娶鎮安岑氏女生子三岑謀奪錠襲職厚賂家僮斌害之斌白其事於官岑忿且恐殺斌妻挾二子遁鎮安旣二世矣紫江悉迎其族類以業以歸千金之產置券亦畀之境內貧不能葬與棄骸中野者舉而掩之無慮五百五十有奇其威鎮百蠻雖獲疾在告宵柝無警一時名流咸服其智勇紫江諱希儀字唐佐其生也有紫水中流之祥乃號紫江云贊曰將畧賢聲楚粵藉甚怨而靡蓄功焉弗矜類族掩骼捐產揮金擾擾籌策疊疊緯經屹然封守四境式甯務成知止完矣令名

按粵西文載有明唐順之沈紫江廣右軍功志文長不錄

鮑一文曾祖名玉臨淮人洪武元年以從龍功授武毅將軍祖安父貴世襲衛指揮僉事永樂四年貴調征安南卒於軍長子一武襲世職督父本兵尋病卒無嗣而公以兄終弟及故得襲職仍督本兵除廣西奉議衛正統二年總兵山雲調大藤峽攻老鼠塘龍山下里等賊巢親斬賊級上官器重之久于其任越十年卒於官子愷有父風由世職升指揮使奉都督顏彪命征潯州炭山後襲職罔替遂世爲貴人

梁志

按府志諸蠻篇藤峽始末下龍山下里在今北山里又平天山有支脈西趨覃塘六廬山名老鼠尾與龍山毗連所謂老鼠塘當卽指此梁志謂老鼠塘屬橫貴交界誤

岑孝子失其名家貧傭隣家日必三省其親以傭值供甘旨親沒哀號無措典地買棺鄉人爲歛資助葬仍傭於隣日必至墓前且泣且拜有司月給祿米旌其門

府志據文載

李棠少好學家貧不能自給年二十有八始發憤讀書舉成化乙酉

文載

子庚

鄉試第一官襄陽甫任而卒

甘泉

通志誤桂平人

成化庚子舉人授常州府推官以憂去復補蘇州府推官

清刑慎獄人罔稱冤征崇明海寇有功當道交薦會勘徐州賊田適劉瑾用事免歸瑾敗起用稱疾不行泉居官清白宦囊不滿百金子孫貴盛士夫推重養高林壑著有東津手稿

按舊志載鄉賢祠祀施才俞公蒙普沈希儀李棠甘泉六人明嘉

靖四年提學僉事唐胄奏定

蘇時秀少力學家居能以德化鄉人登宏治壬戌進士官戶部主事秩

滿遷郎中性剛介不阿中貴尋授鎮江府通判卒於官

以上府志

劉宗武嘉靖乙酉舉人任漳州同知以廉明稱解組歸田值歲荒盡出其家資賑鄉里

李楷安貧好學手不釋卷耿介自持友人龔七嘗以五十金寄楷及遭

兵燹楷固藏而歸之

以上梁志據通志

徐宗道字希宏懷西里柳春村人以平寇功保都司當天啟末年匪亂饑饉荐臻宗道躬操矢石禦土寇爲桑梓捍衛家故豐鄉里中顛連無告者出倉廩賑之不少吝遠近感德李彬撰文誌其行誼鄉人爲勒碑於思懷永興寺致頌禱焉

府志

清

李彬字伊麗郭南三圖人康熙進士品行冠一邑少貧遭播遷事親盡禮當土寇楊奇清煽亂彬前後救活千餘人或餽金私託拒不受又却吳三桂幣性嗜學工詩文平南親王安達駐師貴邑聞彬有重名爲鄉里所服渴欲一見乃命太守孟禮捧檄到山催謁曰知君篤行清修當此寇賊縱橫必有慷慨報國不負所學之志已辭還山有詩云年來身世幾寒酸富貴不來也自歡聲價好同珠換餅簪纓爭似楮爲冠何當推解笏簣劇竊喜侯門禮教寬乞得一麾歸絕澗白雲猶滿菊花團年九十卒著有愚石居詩文集子懋培有傳

清徐樹屏李彬墓誌銘

先生諱彬字伊麗號厚齋又別號愚石居士先世山東日照人先人占籍於貴多歷年所矣先生之二世祖湘湄公明乙酉解元官湖廣襄陽府知府曾祖梅溪公庠生祖靜亭公庠生父立前公廩貢生先生生有異稟喜讀書明季土寇縱劫逃避山林流離萬狀亦手一編不輟性至孝立前公歿家道蕩燬乞貸以殮奉母色養無違庚子遊庠丙

午領鄉薦庚戌成進士授內閣中書先生未遇時每多異兆其正氣足以服邪魔就童子試先受知於邑令楊公招之讀書衙齋後又受知於邑令方公時貴邑再遭兵燹田荒賦逋百姓逃亡催科無自知先生信義足以服人挽之招集先生與令約曰新舊併徵民不堪命惟有走險死耳若停舊徵新少爲休息民乃樂歸故土令從其議故貴邑之田賦迄今如故庚戌潯有妖人爲亂聚黨數萬攻城掠野術窮而敗郡縣捕逆黨甚迫時先生方登第密訪得真僞白之鎮府令縣甦郡邑之誣黨者千餘人有邑令楊公者先生同榜友也因土寇抗糧致累考成請兵搗其巢雖鎖惡護良而崑崗火災不無玉石俱焚先生脫良善於難者又不啻數百人至今皆嘖嘖人口先生居心恬退淡於仕進嘗曰讀書以明理行義以達道折腰五斗非大有爲之地吾豈以彼易此哉故除書屢促堅臥不起竟終身不受一職會朝廷詔舉隱逸邑侯欲以先生應命苦辭獲免其恬淡有如此生平設帳授徒懷清履潔當事頗爲式廬而未嘗以私事相干謁不矜己長不斥人短周而不比樂易可親至於名節攸關則確乎不拔雖責育無以相奪存活人無算而不自名其功其陰行而不知者更不可以數計居家置祀田以永血食給膏火以振書香設義渡以濟行人脩邑乘與宗譜以厚人心而聯族誼凡可以益人利物之事靡不隨分力爲好著述手口披吟無間晨夕所著有愚石居野錄百體兼備皆卓然見道之言而課兒十則關切倫常發揮義理尤爲可法可傳其出處本末立身行己若先生者真可謂無間然矣先生生於崇禎癸酉年二月初六日戌時卒於康熙壬寅年五月初九日未時享年九十於甲辰年七月十一日窆兆於思徽白象嶺山之陽